



ქობულეთის მუნიციპალიტეტის საკრებულო

გ ა ნ კ ა რ გ უ ლ ე ბ ა №118

2011 წლის 20 სექტემბერი
ქ. ქობულეთი

ქობულეთის მუნიციპალიტეტის ტერიტორიაზე საკურორტო ზოლში შინაური ცხოველების შენახვის წესების დამტკიცების შესახებ

„ადგილობრივი თვითმმართველობის შესახებ“ საქართველოს ორგანული კანონის 22-ე მუხლის პირველი პუნქტის „ძ“ ქვეპუნქტის შესაბამისად:

1. დამტკიცდეს ქობულეთის მუნიციპალიტეტის ტერიტორიაზე შინაური ცხოველების შენახვის წესები, თანახმად დანართისა.

2. დამტკიცებული წესების დარღვევისათვის საქართველოს ზოგადი ადმინისტრაციული კოდექსის 171-ე მუხლის მე-4 პუნქტის შესაბამისად საჯარო სანქციები განისაზღვროს ფიზიკურ პირებზე 50 ლარით, ხოლო იურიდიულ პირებზე 100 ლარით, განმეორებით შემთხვევებში ფიზიკურ პირებზე 100 ლარით, ხოლო იურიდიულ პირებზე 200 ლარით.

3. ქობულეთის მუნიციპალიტეტის გამგეობამ უზრუნველყოს:

ა) ქობულეთის მუნიციპალიტეტის ტერიტორიაზე შინაური ცხოველების შენახვის წესების მოსახლეობაში ფართო პროპაგანდა ქალაქის ადგილობრივი საინფორმაციო საშუალებების გამოყენებით;

ბ) შესაბამის კომპეტენტურ ორგანოებთან ერთად, ამ გადაწყვეტილებით მიღებული წესების შესრულების კოორდინაციისა და კონტროლის განხორციელება;

გ) დაჭერილი უმეტეაღყურეო, მოხეტიალე შინაური ცხოველების განთავსებისათვის სპეციალური ადგილის გამოყოფის თაობაზე შესაბამისი წინადადებების ერთად შემუშავდება ქობულეთის მუნიციპალიტეტის ტერიტორიის დაგვა - დასუფთავებისათვის მომსახურე იურიდიულ პირთან;

დ) დაჭერილი ცხოველების სამდღიანი კვებით უზრუნველყოფისა და მათი შენახვის ხარჯების მოქალაქეთა მიერ გადახდის წესის შესახებ წინადადებების შემუშავება და წარმოდგენა განხორციელდება ქობულეთის მუნიციპალიტეტის ტერიტორიის დაგვა - დასუფთავებისათვის მომსახურე იურიდიულ პირთან;

4. კონტროლი განკარგულების შესრულებაზე დაევალოს ქობულეთის მუნიციპალიტეტის საკრებულოს თავმჯდომარის მოადგილეს (ე. ბაგრატიონი).

5. ამ განკარგულების ძალაში შესვლისთანავე ძალადაკარგულად გამოცხადდეს ქობულეთის მუნიციპალიტეტის საკრებულოს 2010 წლის 1 აგვისტოს №73 განკარგულება.

6. განკარგულება შეიძლება გასაჩივრდეს ერთი თვის ვადაში ბათუმის საქალაქო სასამართლოში (მის: ქ. ბათუმი, ზუბალაშვილის ქ. №-30).

7. განკარგულება ძალაშია ხელმოწერისთანავე.

საკრებულოს თავმჯდომარე

ნ. ბერაძე

**ქობულეთის მუნიციპალიტეტის ტერიტორიაზე საკურორტო ზოლში
შინაური ცხოველების შენახვის წესების შესახებ**

1. ეს წესი ვრცელდება ქობულეთის მუნიციპალიტეტის საკურორტო ზოლში (ქ.ქობულეთი, დაბა ჩაქვი, სენაკი-ბათუმი-სარფის ავტომაგისტრალის დასავლეთი მხარე ზღვის სანაპირომდე და აღმოსავლეთი მხარე 300-მეტრიან ზოლში) მცხოვრებ კერძო პირებზე, რომლებსაც საკუთრებაში ან მფლობელობაში ჰყავთ ძაღლი, ძროხა ან სხვა შინაური ცხოველი (შემდგომში –ცხოველი).

2. ქ. ქობულეთში ცხოველების შენახვა შესაძლებელია მხოლოდ სპეციალურად იზოლირებულ ტერიტორიაზე (კარგად შემოღობილი ეზოები, ნაკვეთები და სხვა) ან დაბმულ მდგომარეობაში, მოვლა-შენახვის წესების, ზოოჰიგიენური და ვეტერინარულ-სანიტარული ნორმების სრული დაცვით.

3. ცხოველების მესაკუთრეები (მფლობელები) ვალდებული არიან:

ა) არ დაუშვან ცხოველების გაშვება იზოლირებული ტერიტორიის ფარგლებს გარეთ – ქალაქის ქუჩებში, პარკებში, სკვერებში და სხვა საზოგადოებრივი თავშეყრის ადგილებში ძაღლების გასეირნება ქალაქის ტერიტორიაზე დასაშვებია მხოლოდ მოკლე საბმელისა და ალიკაპის გამოყენებით);

ბ) მკაცრად დაიცვან ცხოველების შენახვის წესები, უზრუნველყონ გარემომცველ პირთა უსაფრთხოება და არ დაუშვან ცხოველების მიერ საერთო სარგებლობის ადგილების დაზიანება, ნარგავების დაზიანება, აგრეთვე ცხოველებისათვის არაკეთილსაიმედო (ანტისანიტარული) პროდუქტების გამოყენება ქალაქის ტერიტორიაზე არსებული სხვადასხვა ნარჩენების სახით;

გ) ცხოველების ტრანსპორტით გადაყვანისას უზრუნველყონ მოქალაქეთა უსაფრთხოების წესების დაცვა;

დ) ისარგებლონ ვეტერინარიის სამსახურის სათანადო კონსულტაციებით ამ განკარგულებისა და ცხოველთა შენახვის წესების შესრულებასთან დაკავშირებით.

4. მოხეტიალე, უმეთვალყურეოდ ან/და უპატრონოდ მყოფი ცხოველები ექვემდებარებიან დაუყოვნებლივ დაჭერასა და იზოლაციას.

5. ქობულეთის მუნიციპალიტეტის ტერიტორიის დაგვა-დასუფთავებისათვის მომსახურე იურიდიული პირი, უმეთვალყურეოდ, უპატრონოდ გაშვებული ცხოველების დაჭერის შემთხვევაში მათ ათავსებს სპეციალურად გამოყოფილ ადგილას და უზრუნველყოფს სამდღიანი სათანადო კვებით.

6. დაჭერილი ცხოველის მესაკუთრე, მფლობელი ვალდებულია ქობულეთის მუნიციპალიტეტის ტერიტორიის დაგვა-დასუფთავებისათვის მომსახურე იურიდიულ

პირს მიაკითხოს ცხოველის დაჭერიდან სამი კალენდარული დღის ვადაში და წარუდგინოს ცხოველის, მფლობელობის დამადასტურებელი დოკუმენტი ან სხვაგვარად დაასაბუთოს საფუძვლიანობა.

7. მესაკუთრეობის, მფლობელობის დამტკიცების შემთხვევაში ცხოველი უბრუნდება მის მფლობელს, მესაკუთრეს მხოლოდ მას შემდეგ, როცა მის მიერ დადგენილი წესით გადახდილი იქნება ცხოველის შენახვის (კვების) ხარჯები და შესაბამისი ჯარიმის თანხა.

8. თუ დაჭერილი ცხოველის მესაკუთრე ცხოველის დაჭერიდან 3 დღის ვადაში არ გამოცხადდება ქობულეთის მუნიციპალიტეტის ტერიტორიის დაგვა-დასუფთავებისათვის მომსახურე იურიდიულ პირთან ან გამოცხადდება ცხოველის დაბრუნების მოთხოვნით, მაგრამ იგი არ გადაიხდის ცხოველის შენახვის ხარჯებსა და საჯარიმო თანხას, ასეთ დროს ქობულეთის მუნიციპალიტეტის ტერიტორიის დაგვა-დასუფთავებისათვის მომსახურე იურიდიულ პირს უფლება აქვს მოქმედი კანონმდებლობით დადგენილი წესით უზრუნველყოს ცხოველის რეალიზაცია და ამგვარად ცხოველის შენახვისა და საჯარიმო თანხის ამოღება.

9. დაჭერილი ცხოველის რეალიზაციის შემთხვევაში (იურიდიული პირი) ვალდებულია დაუბრუნოს თანხა ცხოველის მესაკუთრეს იმ ოდენობით, რაც აღემატება ცხოველის შენახვის ხარჯებისა და საჯარიმო თანხის საერთო ოდენობას. იმავე დროს (იურიდიული პირს) უფლება აქვს ცხოველის მესაკუთრეს, მფლობელს კანონმდებლობით დადგენილი წესით მოთხოვოს თანხა იმ ოდენობით რა ოდენობითაც ნაკლებია ცხოველის რეალიზაციიდან მიღებული თანხა ცხოველის შენახვის ხარჯებსა და საჯარიმო თანხის საერთო ოდენობაზე.